

**ACORDO DE COLABORACIÓN ENTRE A CONSELLERÍA DO MAR E A AXENCIA PARA A MODERNIZACIÓN TECNOLÓXICA DE GALICIA PARA A CREACIÓN , DESENVOLVEMENTO, DINAMIZACIÓN, ALOXAMENTO E MANTEMENTO DO PORTAL WEB E A PLATAFORMA VIRTUAL DO SEALab (WEB), DENTRO DO PROXECTO SEALabHaus; Project (EAPA\_0029/2022) APROBADO NO MARCO DO PROGRAMA DE COOPERACIÓN TERRITORIAL EUROPEA (Interreg Atlantic Area 2021 – 2027)**

En Santiago de Compostela, 11 de abril de 2025.

### REUNIDOS

Dunha parte, Alfonso Villares Bermúdez, conselleiro do Mar, actuando en nome e representación da Consellería do Mar da Xunta de Galicia, en virtude das facultades recoñecidas polo artigo 34 da Lei 1/1983, do 22 de febreiro, de normas reguladoras da Xunta e a súa presidencia.

Doutra parte, Julián Cerviño Iglesia, director da Axencia para a Modernización Tecnolóxica de Galicia (en adiante AMTEGA), co NIF Q1500382E, actuando en nome e representación da dita axencia, en virtude das facultades conferidas polo Decreto 9/2021, do 21 de xaneiro, polo que se suprime o Centro Informático para a Xestión Tributaria, Económico-Financeira e Contable (CIXTEC) e se modifica o Decreto 252/2011, do 15 de decembro polo que se crea a Axencia para a Modernización Tecnolóxica de Galicia e se aproban os seus estatutos, e o Decreto 149/2022, do 1 de setembro, polo que se nomea director da Axencia para a Modernización Tecnolóxica de Galicia.

As partes recoñécense capacidade e representación suficientes para formalizar o presente acordo de colaboración e, na súa virtude

### EXPOÑEN

**Primeiro.** Que o programa Interreg Espacio Atlántico 2021-2027 é un programa de cooperación transnacional da Unión Europea (UE) financiado polo Fondo Europeo de Desenvolvemento Regional (FEDER), co obxectivo da Cooperación Territorial Europea da Política de Cohesión da UE.

O 28.06.2023 foi aprobado na primeira convocatoria do programa Interreg Espacio Atlántico 2021-2027 o proxecto SEALabHaus, o novo Laboratorio Atlántico da Bauhaus para a Arquitectura, o Patrimonio, a Cultura e o Turismo do Mar según os principios da nova Bauhaus Europea.

O proxecto SEALabHaus reúne a unha ampla gama de socios e partes interesadas das cinco rexións e a súa creación facilitará a cooperación transnacional para levar a cabo desafíos comúns a través das fronteiras. O socio líder do proxecto é a Universidade da Coruña e a Dirección Xeral de Desenvolvemento Pesqueiro da Consellería do Mar participa como socio no proxecto. O proxecto ten unha duración de 36 meses, cun prazo de execución dende o 31.12.2023 ata o 31.12.2026.

SEALab será un laboratorio, unha plataforma virtual colaborativa que integra os materiais e resultados do proxecto e actuará como acelerador e conector de proxectos e industrias culturais e creativas de turismo azul relacionados co mar, inspirados na nova Bauhaus Europea, conectándoos para o apoio e o aprendizaxe mutuo.

Segundo o proxecto aprobado, a Xunta de Galicia como socio do proxecto debe crear unha plataforma dixital, o Laboratorio Virtual da nova Bauhaus do Espazo Atlántico (plataforma colaborativa que inclúe ferramentas e servizos dixitais); crearase deste xeito unha plataforma TIC interactiva para ofrecer asesoramento intelixente aos beneficiarios do proxecto.

A páxina de inicio do laboratorio proporcionará un espazo de traballo para que a rede de voluntarios actúe como mentores dentro da plataforma interactiva.

Esta plataforma tamén pretende reforzar o coñecemento dos profesionais de apoio ao emprendemento mediante metodoloxías innovadoras, formación e ferramentas dixitais.

**Segundo.** Que o Decreto 42/2024, de 14 de abril, polo que se establece a estrutura orgánica da Xunta de Galicia, crea a Consellería do Mar, sendo a Dirección Xeral de Desenvolvemento Pesqueiro un dos seus órganos de

dirección de conformidade co establecido no Decreto 49/2024, de 22 de abril, polo que se fixa a estrutura orgánica das consellerías da Xunta de Galicia.

Que o servizo de Desenvolvemento Pesqueiro, dependente directamente da devandita Dirección Xeral de Desenvolvemento Pesqueiro, ten atribuídas as competencias específicas recollidas no artigo 12.2.2.1 do Decreto 50/2021, do 11 de marzo, polo que se aproba a estrutura orgánica da Consellería do Mar, entre as que se menciona a coordinación, programación e execución das actividades de divulgación e de transferencia tecnolóxica nas comunidades pecadoras e litorais.

**Terceiro.** Que, segundo o artigo 9 do Estatuto da Axencia para a Modernización Tecnolóxica de Galicia, aprobado polo Decreto 252/2011, do 15 de setembro, a AMTEGA ten entre as súas competencias a dirección e xestión de todas as actuacións da Xunta en materia de tecnoloxías da información e as comunicacións e o deseño e liderado de iniciativas que contribúan a impulsar o desenvolvemento da sociedade da información en Galicia, garantindo os dereitos dos cidadáns e eliminando as barreiras que se opoñan á expansión e ao uso das novas tecnoloxías.

Así mesmo, de acordo do artigo 5 do mencionado decreto 252/2011, queda desconcentrada na persoa titular da dirección da AMTEGA a competencia para subscribir con entidades públicas e privadas, no seu nome, convenios de colaboración excluídos da lexislación de contratos do sector público.

**Cuarto.** A Lei 14/2013, do 26 de decembro, de racionalización do sector público, establece no seu artigo 14 que a Administración Xeral da Comunidade Autónoma e as entidades do sector público, ou estas entre elas, poderán formalizar acordos de colaboración ou cooperación para o servizo aos intereses xerais mediante o desempeño conxunto de tarefas de interese público da súa competencia.

Desde a efectividade da integración na AMTEGA dos servizos, recursos económicos e persoal de tecnoloxías da información e comunicacións da

Consellería do Mar, a contratación en materia de Tecnoloxías da Información e as Comunicacions corresponde, con carácter exclusivo, á mesma.

Non obstante, en atención a súa tipoloxía, os expedientes financiados con Fondos Europeos continuarán sendo xestionados pola Consellería do Mar ata que pola AMTEGA se cumpran todos os requisitos legalmente establecidos para asumir a xestión antedita.

Tendo isto en conta, e de cara a conciliar esta excepción coa competencia exclusiva da AMTEGA para a dirección e xestión de todas as actuacións da Xunta en materia de tecnoloxías da información e as comunicacións, cómpre levar á cabo este acordo de colaboración para a creación , desenvolvemento, dinamización, aloxamento e mantemento do portal web e a plataforma virtual do SEALab (WEB), dentro do proxecto SEALabHaus; traballos que deben ser dirixidos e coordinados pola AMTEGA.

Por outra banda, o Consello da Xunta, na súa xuntanza do 1 de agosto de 2014, acordou aprobar “as instrucións para o establecemento dun modelo de sustentabilidade para a dixitalización dos servizos públicos”.

Seguindo o modelo de sustentabilidade para dixitalización dos servizos públicos, a Consellería do Mar, e a AMTEGA manifestan a súa vontade de colaboración e con tal finalidade acordan a sinatura do presente acordo con suxeición ás seguintes

## CLÁUSULAS

### Primeira. Obxecto

O obxecto do presente acordo é establecer as pautas que se seguirán na colaboración entre a Consellería do MAR e a AMTEGA para creación , desenvolvemento, dinamización, aloxamento e mantemento do portal web e a plataforma virtual do SEALab (WEB), dentro do proxecto SEALabHaus; Project (EAPA\_0029/2022) aprobado no marco do Programa De Cooperación Territorial Europea (Interreg Atlantic Area 2021 – 2027).

## Segunda. Financiamento

O importe da achega da Consellería do Mar para a execución do proxecto mencionado na cláusula primeira ascenderá a un máximo de 50.000,00 EUROS (IVE incluído), para as anualidades 2025 e 2026.

Estes importes serán obxecto de retención de crédito nas seguintes aplicacións orzamentarias e proxectos do seu orzamento:

- Importe total: 50.000,00 € (75% FEDER e 25% fondos propios da C.A.)
- Aplicación orzamentaria: 16.03.722A.640.0
- Código proxecto: 2024 00229
- Anualidades: 2025 e 2026

Aplicación orzamentaria e cód. proxecto	2025	2026	TOTAL
16.03.722A.640.0 - 2024 00229	35.000,00	15.000,00	50.000,00 €

## Terceira. Actuacións a desenvolver

Ao abeiro deste acordo, pola AMTEGA, desenvolverase no marco do obxecto descrito na cláusula primeira, a creación do portal web e da plataforma virtual colaborativa SEALab, obxectivo principal do proxecto SEALabHaus, que estará dotado de ferramentas TIC para o intercambio de información e coñecemento, formación e asesoramento das entidades participantes no proxecto, así como as resto de membros da Comunidade Atlántica.

Os traballos a realizar consistirán na xestión de dominios e aloxamento web, creación e deseño da plataforma e mantemento e actualización do sitio web.

## Cuarta. Compromisos das partes

Ao abeiro deste acordo, pola AMTEGA desenvolveranse os seguintes compromisos:



- A tramitación administrativa e adxudicación do contrato ou contratos que teñan lugar para a realización do obxecto anteriormente definido. Para iso, a AMTEGA, como órgano de contratación, iniciará e aprobará os correspondentes expedientes de contratación. A AMTEGA actuará no expediente de contratación e na execución do contrato en nome e por conta das partes participantes neste acordo e poderá exercer todas as potestades que a lexislación lle recoñece ao órgano de contratación fronte ao contratista, sen prexuízo da adecuada coordinación nas relacións internas coa Consellería do Mar.
- O seguimento e a dirección das actuacións obxecto do acordo e contratos derivados do mesmo.
- O cumprimento das medidas de información e publicidade establecidas na cláusula sétima do presente acordo.

Pola Consellería do Mar desenvolveranse os seguintes compromisos:

- A definición detallada dos requisitos e funcionalidades que o novo sistema de información debe implantar.
- A tramitación económica e o financiamento dos expedientes de contratación derivados do presente acordo.
- O abono ao contratista ou contratistas polos servizos prestados, nos termos establecidos no contrato e segundo o prezo de adxudicación, unha vez recibidos de conformidade e certificados pola AMTEGA.

A AMTEGA e a Consellería do Mar, desenvolverán de xeito conxunto os seguintes compromisos:

- Elaboración dos pregos de cláusulas administrativas particulares e de prescricións técnicas.

- Participación no órgano de contratación, que estará asistido, se fose necesario, por unha Mesa de Contratación constituída por persoal da AMTEGA, e un representante designado pola Consellería do Mar. Tamén poderá participar persoal de ambas partes na emisión dos informes técnicos.

Asemade desenvolverase polas partes calquera outra actuación que, sendo complementaria das anteriores, acorden a Consellería do Mar e a Amtega, sempre que o seu custo estimado non supere o importe da achega máxima da Consellería recollido na cláusula segunda.

No caso de actuacións que supuxeran un engadido temporal ou financeiro sobre o marco establecido no presente acordo, poderán subscribirse as addendas que ambas partes acorden.

A titularidade dos sistemas e calquera resultado obtido coa execución das actividades obxecto do presente acordo, será da Amtega, conforme ás súas competencias.

### **Quinta. Medidas de publicidade do FEDER**

A AMTEGA cumprirá, naqueles proxectos con financiamento FEDER, coas medidas de visibilidade, transparencia e comunicación establecidas nos artigos 46-50 e Anexo IX do Regulamento de disposicións comúns 2021/1160 do Parlamento europeo e do Consello (RDC), do 24 de xullo, e demais disposicións que se establezan ao efecto.

### **Sexta. Vixencia**

Este acordo producirá os seus efectos a partir da data da súa sinatura e a súa vixencia estenderase ata o momento que cese o desenvolvemento nel previsto, e como data límite, o 30 de novembro de 2026; sen menoscabo das posibles addendas ou prórrogas que as partes podan establecer e formalizar antes da finalización da vixencia inicial deste acordo.

### **Sétima. Publicidade do acordo**

Será de aplicación no relativo á publicidade e rexistro do acordo de colaboración o disposto na Lei 1/2016, do 18 de xaneiro, de transparencia e bo goberno.

Procederáse a súa inscrición no Rexistro de Convenios, de conformidade co establecido no artigo 5 do Decreto 126/2006, do 20 de xullo, polo que se regula o Rexistro de Convenios da Xunta de Galicia.

### **Oitava. Réxime xurídico e resolución de conflitos**

Este acordo de colaboración ten natureza administrativa, e rexeráse pola Lei 14/2013, do 26 de decembro, de racionalización do sector público autonómico e pola demais normativa de aplicación.

As discrepancias que se poidan producir resolveranse nos termos previstos no artigo 13 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, para os conflitos de atribucións.

E en proba de conformidade co exposto, asinan este acordo no lugar e data sinalados.

Pola Consellería do Mar  
O conselleiro do Mar

Pola AMTEGA  
O director da Axencia para a  
Modernización Tecnolóxica de Galicia

Alfonso Villares Bermúdez

Julián Cerviño Iglesia